

REGLUGERÐ

um verndarráðstafanir varðandi innflutning á samlokum frá Tyrklandi sem eru ætlaðar til manneldis.

1. gr.

Ákvæði samningsins um Evrópska efnahagssvæðið sem vísað er til í I. kafla I. viðauka og XII. kafla II. viðauka, skulu öðlast gildi með breytingum og viðbótum sem leiðir af I. og II. viðauka, bókun 1 við samninginn og öðrum ákvæðum hans. Á grundvelli ákvörðunar sameiginlegu EES-nefndarinnar nr. 134/2007, frá 26. október 2007, öðlast eftirfarandi ESB-gerð gildi hér á landi:

1. Framkvæmdarreglugerð framkvæmdastjórnarinnar (ESB) nr. 743/2013 frá 31. júlí 2013 um verndarráðstafanir varðandi innflutning á samlokum frá Tyrklandi sem eru ætlaðar til manneldis.
2. Framkvæmdarreglugerð framkvæmdastjórnarinnar (ESB) nr. 840/2014 frá 1. ágúst 2014 um breytingu á framkvæmdarreglugerð (ESB) nr. 743/2013 um verndarráðstafanir varðandi innflutning á samlokum frá Tyrklandi, sem eru ætlaðar til manneldis, að því er varðar gildistíma hennar.

2. gr.

Ofangreindar reglugerðir framkvæmdastjórnarinnar eru birtar sem fylgiskjöl við reglugerð þessa.

3. gr.

Matvælastofnun og heilbrigðisnefndir sveitarfélaga undir yfirumsjón Matvælastofnunar fara með eftirlit með því að ákvæðum þessarar reglugerðar sé framfylgt í samræmi við 6. og 22. gr. laga nr. 93/1995.

4. gr.

Um brot gegn reglugerð þessari fer samkvæmt 30. gr., 30. gr. a – 30. gr. e og 31. gr. laga nr. 93/1995 um matvæli.

5. gr.

Reglugerð þessi er sett samkvæmt heimild í 31. gr. a laga nr. 93/1995 um matvæli, með síðari breytingum.

6. gr.

Reglugerðin öðlast þegar gildi.

Atvinnuvega- og nýsköpunarráðuneytinu, 22. september 2014.

F. h. sjávarútvegs- og landbúnaðarráðherra,

Ólafur Friðriksson.

Eggert Ólafsson.

Fylgiskjal 1.**FRAMKVÆMDARREGLUGERÐ FRAMKVÆMDASTJÓRNARINNAR (ESB) nr. 743/2013****frá 31. júlí 2013****um verndarráðstafanir varðandi innflutning á samlokum frá Tyrklandi sem eru ætlaðar til manneldis****(Texti sem varðar EES)**

FRAMKVÆMDASTJÓRN EVRÓPUSAMBANDSINS HEFUR,

með hliðsjón af sáttmálanum um starfshætti Evrópusambandsins,

með hliðsjón af tilskipun ráðsins 97/78/EB frá 18. desember 1997 um meginreglur um skipulag dýraheilbrigðiseftirlits með afurðum sem fluttar eru inn til Bandalagsins frá þriðju löndum (¹), einkum 1. mgr. 22. gr.,*og að teknu tilliti til eftirfarandi:*

- 1) Endurskoðunarþjónusta framkvæmdastjórnarinnar, Matvæla- og dýraheilbrigðisskrifstofan, annaðist eftirfylgniúttekt í Tyrklandi til að meta opinbert eftirlit með framleiðslu fiskafurða og samloka sem ætlaðar eru til útflutnings til Sambandsins. Í úttektinni var komist að raun um að nokkrir annmarkar voru á framkvæmd opinbera eftirlitsins, einkum voru umtalsverðir ágallar á greiningum hjá þeim rannsóknarstofum sem heimsóttar voru. Af þessum sökum getur lögbært yfirvald í Tyrklandi ekki tryggt með áreiðanlegum hætti að heilbrigðiskröfum Sambandsins fyrir allar samlokur, sem fluttar eru út til Sambandsins, sé fullnægt.
- 2) Að auki hafa aðildarríki tilkynnt um mikinn fjölda sendinga af samlokum, sem eru upprunnar í Tyrklandi og eru ekki í samræmi við tilskilin ákvæði, sem uppfylltu ekki örverufræðilega staðla Sambandsins.
- 3) Til að vernda heilbrigði manna þykir rétt að samlokur, sem eru upprunnar í Tyrklandi, gangist undir viðeigandi skoðanir til að koma í veg fyrir að afurðir, sem eru óhæfar til manneldis, séu settar á markað. Lögbær yfirvöld ættu að kyrrsetja sendingarnar, sem um er að ræða, á skoðunarstöð á landamærum þar sem þær koma inn í Sambandið, þangað til þeim berast niðurstöður slíkra skoðana.
- 4) Þar eð geymsluþol lifandi og kældra samloka er mjög lítið er ekki unnt að framkvæma prófanir við landamæri Sambandsins sem minna takmarkandi ráðstöfun í viðskiptum. Sendingar af þeim samlokum hefðu orðið óhæfar til manneldis áður en niðurstöður rannsóknarstofu lægju fyrir. Því þykir rétt að stöðva tímabundið innflutning til Sambandsins á lifandi og kældum samlokum, sem eru upprunnar í Tyrklandi, þangað til tyrknesk yfirvöld eru í stakk búin að leggja fram nauðsynlegar ábyrgðir.
- 5) Ráðstafanirnar, sem kveðið er á um í þessari reglugerð, eru í samræmi við álit fastanefndarinnar um matvælaferlið og heilbrigði dýra.

SAMÞYKKT REGLUGERÐ ÞESSA:

1. gr.

Reglugerð þessi gildir um lifandi, kældar, frystar og unnar samlokur sem eru ætlaðar til manneldis og eru upprunnar í Tyrklandi.

2. gr.

Aðildarríkin skulu ekki leyfa innflutning til Sambandsins á lifandi og kældum samlokum frá Tyrklandi.

3. gr.

1. Aðildarríkin skulu framkvæma prófanir á sendingum af frystum og unnum samlokum, sem eru upprunnar í Tyrklandi, eins og kveðið er á um í 2. mgr., og nota til þess viðeigandi sýnatökuáætlanir og greiningaraðferðir.

Þessar prófanir skulu fara fram við skoðunarstöð á landamærum þar sem sendingarnar, sem um er að ræða, koma inn í Sambandið.

2. Aðildarríkin skulu framkvæma þær prófanir sem eru nauðsynlegar til að greina:

- a) mengun af völdum kólligerils í öllum sendingum af frystum samlokum,
- b) sjávarlífeitur í öllum sendingum af frystum eða unnum samlokum.

3. Sendingarnar sem gangast undir prófanir, sem um getur í 1. og 2. mgr., skulu vera áfram undir eftirliti lögbærra yfirvalda við viðkomandi skoðunarstöð á landamærum þar til niðurstöður úr þeim prófunum berast og eru metnar.

4. Ef prófanirnar, sem um getur í 1. og 2. mgr., sýna fram á að líklegt sé að sending sé skaðleg heilbrigði manna skal lögbært yfirvald tafarlaust leggja hald á sendingarnar og eyða þeim.

4. gr.

Allur kostnaður sem stofnað er til við beitingu þessarar reglugerðar skal gjaldfærður á rekstraraðilann eða fulltrúa hans, sem ber ábyrgð á sendingunni, þegar þeirri sendingu er vísað fram á skoðunarstöð á landamærum þar sem hún kemur inn í Sambandið.

Nr. 847

22. september 2014

5. gr.

Reglugerð þessi öðlast gildi á þriðja degi eftir að hún birtist í *Stjórnartíðindum Evrópusambandsins*.

Hún gildir til 4. ágúst 2014.

Reglugerð þessi er bindandi í heild sinni og gildir í öllum aðildarríkjunum án frekari lögfestingar.

Gjört í Brussel 31. júlí 2013.

Fyrir hönd framkvæmdastjórnarinnar,

forseti.

José Manuel BARROSO

(¹) Stjtið. EB L 24, 30.1.1998, bls. 9.

Fylgiskjal 2.**FRAMKVÆMDARREGLUGERÐ FRAMKVÆMDASTJÓRNARINNAR (ESB) nr. 840/2014**

frá 1. ágúst 2014

um breytingu á framkvæmdarreglugerð (ESB) nr. 743/2013 um verndarráðstafanir varðandi innflutning á samlokum frá Tyrklandi, sem eru ætlaðar til manneldis, að því er varðar gildistíma hennar

(Texti sem varðar EES)

FRAMKVÆMDASTJÓRN EVRÓPUSAMBANDSINS HEFUR,

með hliðsjón af sáttmálanum um starfshætti Evrópusambandsins,

með hliðsjón af tilskipun ráðsins 97/78/EB frá 18. desember 1997 um meginreglur um skipulag dýraheilbrigðiseftirlits með afurðum sem fluttar eru inn til Bandalagsins frá þriðju löndum⁽¹⁾, einkum 6. mgr. 22. gr.,

og að teknu tilliti til eftirfarandi:

- 1) Framkvæmdarreglugerð framkvæmdastjórnarinnar (ESB) nr. 743/2013⁽²⁾ var samþykkt þegar í ljós komu, við úttekt endurskoðunarþjónustu framkvæmdastjórnarinnar, Matvæla- og dýraheilbrigðisskrifstofunnar, annmarkar í Tyrklandi á framkvæmd opinbera eftirlitsins með framleiðslu á samlokum, sem eru ætlaðar til útflutnings til Sambandsins, og þar eð aðildarríki tilkynntu um sendingar af samlokum, sem voru upprunnar í Tyrklandi og voru ekki í samræmi við tilskilin ákvæði, sem uppfylltu ekki örverufræðilega staðla Sambandsins.
- 2) Lögbær yfirvöld í Tyrklandi lögðu fram upplýsingar um þær ráðstafanir til úrbóta sem hafa verið gerðar til að ráða bót á annmörkum sem komu í ljós í eftirlitskerfi með samlokum sem eru ætlaðar til útflutnings til Sambandsins. Vegna þess hversu alvarlegir ágallarnir eru, sem komu í ljós við úttekt Matvæla- og dýraheilbrigðisskrifstofunnar, er þó eftirfylgniúttekt Matvæla- og dýraheilbrigðisskrifstofunnar nauðsynleg áður en unnt er að íhuga afnám ráðstafananna. Enn fremur hafa aðildarríki tilkynnt um tiltekin tilvik þar sem samlokur, sem var framvísað til skoðunar á skoðunarstöð á landamærum þar sem sendingarnar koma inn í Sambandið, uppfylltu ekki örverufræðilega staðla.
- 3) Því ber að breyta gildistíma beitingar framkvæmdarreglugerðar (ESB) nr. 743/2013 til samræmis við það.
- 4) Ráðstafanir, sem kveðið er á um í þessari reglugerð, eru í samræmi við álit fastanefndarinnar um plöntur, dýr, matvæli og fóður.

SAMÞYKKT REGLUGERÐ ÞESSA:

1. gr.

Í annarri málsgrein 5. gr. framkvæmdarreglugerðar (ESB) nr. 743/2013 komi dagsetningin „4. ágúst 2015“ í stað „4. ágúst 2014“.

2. gr.

Reglugerð þessi öðlast gildi á þriðja degi eftir að hún birtist í *Stjórnartíðindum Evrópusambandsins*.

Reglugerð þessi er bindandi í heild sinni og gildir í öllum aðildarríkjunum án frekari lögfestingar.

Gjört í Brussel 1. ágúst 2014.

Fyrir hönd framkvæmdastjórnarinnar,

forseti.

José Manuel BARROSO

⁽¹⁾ Stjtið. EB L 24, 30.1.1998, bls. 9.⁽²⁾ Framkvæmdarreglugerð framkvæmdastjórnarinnar (ESB) nr. 743/2013 frá 31. júlí 2013 um verndarráðstafanir varðandi innflutning á samlokum frá Tyrklandi sem eru ætlaðar til manneldis (Stjtið. ESB L 205, 1.8.2013, bls. 1).